

Javier Wolter:

Si e refineria habri back tin cu dicidi con pa mantene sostenibel tambe pa termino largo

ORANJESTAD(AAN): A acerca Director di Caribbean Mercantile Bank Javier Wolter pa e banco su opinion tocante di e desaroyonan pa cu un posibel reapertura di e refineria como cu CMB tin un sucursal na San Nicolas y tin experiencia cu e refineria habri y cune cera.

CMB sigur tambe a sinti e impacto di ceramento di e refineria di biaha ora cu nan a laga tur e trahadonan bay, Wolter a bisa. El a splica cu e trafico comercial a cay, tabatin poco negoshi chikito cu a worde afecta y restaurantnan chikito cu a cera. San Nicolas en realidad no tabata prepara pa e golpi ey, el a agrega.

Valero tabata inverti den e refineria y comerciantenan cu tabata "handle" directo cu Valero manera companianan tecnico, di contratista, tiendanan di hardware, tur tabatin beneficio di e refineria y e fluho di placa tabata core, Javier Wolter a comenta. Ora



cu e refineria a cera e fluho ey di placa no tabat'ey mas y te awo e area no a lanta cabez, el a añadi.

E ehecutivo di banco a

subraya cu e factor principal cu mester wak den cualkier inversion ta e sostenibilidad di e negoshi.

El a splica cu por ehempel

den e caso di un Ritz Carlton, e ta un inversion di entre 180 pa 200 miyon Dollar den turismo cu ta sostenibel; e compania ta haci inversion den e negoshi, pero tambe den esunnan cu ta traha den e hotel.

Den e caso di un refineria, mester corda riba e volatilidad di e prijs di crudo; awe a lanta cu un prijs di entre 38 pa 39

Dollar pa bari, tanten cu 18 luna pasa un bari di petroleo tabata costa 100 Dollar. Esaki ta cosnan cu ta afecta henter e mundo di petroleo, Wolter a bisa. Ademas, pa pone ainda mas presion riba e mercado, Iran tambe a cuminsa bende petroleo y esaki ta traduci den mas petroleo riba mercado y pues un bahada ainda mas grandi den e prijs di petroleo. Tin cu bay evalua, ora ta papia di reapertura pues di e refineria, con lo por mantene esaki sostenibel pa un termino largo. Si e refineria habri na San Nicolas e lo definitivamente trece un boost hopi grandi pa San Nicolas y pa Aruba henter, Javier Wolter a bisa, subrayando cu e negoshi aki lo yuda hopi tambe cu "foreign exchange" pa e isla.

Loke ta keda importante, segun e director di banco, ta ken ta bay ta e partner(nan). "Semper mi ta bisa, bo contract ta mes bon cu e partnernan cu ta firm'e"; si tin partnernan serio y por confia riba nan, e contract tin hopi balor, Javier Wolter a bisa enfaticamente, añadiendo cu ta un cos cu mester evalua bon.